


Charloun Riéu

**L'Oudissèio
d'Oumèro**



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

CANT PROUMIÉ

TELEMAQUE

Pèr en BATALLA.

Muso, parlo me d'aquel ome endùstri que barrulè tant de tèms, quouro aguè debana la ciéutadello sacrado de Troio. E veguè li ciéuta de pople noumbrous, n'en couneiguè sis èime; e dins soun cor endure bravamen de malastre sus mar, pèr sa vido e la revengudo de si coumpagnoun. Mai contro sa desiranço noun li sauvè: periguèron pèr sis impieta, li dessena! aguènt manja li biòu dóu Soulèu d'Iperioun, e aquest ié raubè l'ouro dóu retour. Digo-me 'no part d'aquéli causo, Divesso, chato de Jupitèr.

Tóuti, aquéli que s'èron refugi de la negro mort, escàpi de la guerro e de la mar, èron restrema dins sis oustau; mai Ulisse demouravo soulet, liuen de soun país e de sa mouié, e la venerablo ninfo Calipsò, la mai que noblo divesso, lou respichavo dins si baumo crouseludo, lou desirant pèr soun espous. E quand lou tèms venguè, après lou desvertouia dis annado, que li Diéu vouguèron que reveguèsse soun oustau en Itaco, meme alor devié subi de batèsto au mitan di siéu. E tóuti li Diéu n'avien pieta, franc de Netune qu'èro sèmpe encagna contro lou divin Ulisse jusquo à soun retour dins soun país.

E èro ana Netune encò dis Etioupien que demoron alin e soun parteja 'n dous pople, l'un espinchant dóu coustat d'Iperioun au tremount, e l'autre au levant. E lou Diéu se i'èro gandi pèr uno ecatoumbo de brau e d'agnèu. E coume s'engauchihavo, asseta dins aquéu repas, lis àutri Diéu èron reüni dins l'oustau reiau de Jupitèr Oulimpian. E lou Paire dis ome e di Diéu acoumencè de ié parla, se remembrant dins éu l'irreproachable Egiste que l'illustre Ourèsto, enfant d'Agamennoun avié tua. S'ensouvenènt d'acò larguè aquéli